

**Perhimpunan perlu bersyarat – Hishammuddin  
Utusan Online  
15 April, 2012**

IPOH 14 April - Mana-mana kumpulan atau pertubuhan yang mahu berhimpun perlu menyakinkan polis bahawa perhimpunan tersebut akan berlangsung dalam suasana aman dan tidak menyusahkan orang ramai.

Menteri Dalam Negeri, Datuk Seri Hishammuddin Tun Hussein berkata, kerajaan tidak menyekat mana-mana pihak untuk berhimpun tetapi mereka perlu mematuhi syarat-syarat yang ditetapkan oleh polis selaras dengan Akta Perhimpunan Aman 2011.

"Kalau hendak berhimpun, kita tidak sekat asalkan tidak menyusahkan orang ramai. Ini juga menjadi tanggungjawab penganjur.

"Sekiranya pihak Himpunan Bersih 3.0 hendak lakukan sesuatu, mereka perlu yakinkan polis bahawa perhimpunan itu tidak akan menyusahkan orang ramai, orang lain pun terikat dengan syarat-syarat sama," katanya kepada pemberita selepas merasmikan Himpunan Barisan Nasional (BN) Pilihan Orang Muda di kediaman Menteri Besar Perak di sini hari ini.

Beliau mengulas mengenai permohonan oleh beberapa pertubuhan bukan kerajaan (NGO) semalam untuk berhimpun secara aman bagi membantah usaha terancang pihak tertentu menjayakan agenda lesbian, gay, biseksual dan transgender (LGBT) serta seks bebas di negara ini.

Permohonan itu dibuat pertubuhan Jaringan Melayu Malaysia (JMM), Gabungan NGO Malaysia, Persatuan Ibu Bapa dan Guru-Guru (PIBG) mewakili 30 buah sekolah di Lembah Klang dan Persatuan Veteran Tentera Melayu (PVTM) di Ibu Pejabat Polis Daerah (IPD) Dang Wangi di Kuala Lumpur.

Ditanya mengenai tindakan pembangkang mengadakan Perhimpunan Demo Anti Perbadanan Tabung Pendidikan Tinggi Nasional (PTPTN) di Dataran Merdeka hari ini, Hishammuddin yang juga Naib Presiden UMNO menyifatkan pembangkang sudah bankrap idea.

Katanya, PTPTN merupakan satu produk yang baik tetapi ia telah dieksploitasikan oleh pihak tertentu untuk menarik sokongan dan menimbulkan kemarahan orang ramai.

"Saya tengok mereka terkapai-kapai mencari isu. Isu begini kalau kita silap langkah akan dieksploitasi untuk menimbulkan kemarahan orang ramai," katanya.

Beliau meminta para penyokong BN supaya tidak terikut-ikut rentak pembangkang yang suka mencari pasal.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2012&dt=0415&pub=Utusan\\_Malaysia&sec=Dalam\\_Negeri&pg=dn\\_01.htm](http://www.utusan.com.my/utusan/info.asp?y=2012&dt=0415&pub=Utusan_Malaysia&sec=Dalam_Negeri&pg=dn_01.htm)